

大和上、諱鑑真、楊州江陽縣人也。（中略）

日本国天平五年歲次癸酉。沙門榮睿・普照等。隨遣唐大使丹墀真人広成。至唐国留学問。是年唐開元廿一年也。唐国諸寺三藏大德。皆以戒律為入道之正門。若有不持戒者不齒於僧中。於是方知本国無伝戒人。仍請東都大福先寺砂（沙）門道璿律師。附副使中臣朝臣名代之船。先向本国去。擬為伝戒者也。

榮睿・普照留学唐国。已經十載。雖不待使。而欲早帰。於是請西京安国寺僧道抗・澄觀。東都僧德請・高麗僧如海。又請得宰相李林甫之兄林宗之書。與楊州倉曹李湊。令造大舟。備粮送遣。又與日本同学僧玄朗・玄法二人。俱下至楊州。是歲唐天寶元載冬十月。〈日本天平十四年歲次辛巳也〉時大和上在楊州大明寺、為衆僧講律。榮睿・普照師至大明寺、頂禮大和上足下、具述本意曰。「佛法東流、至日本國。雖有其法。而無傳法人。本國昔聖德太子曰。『二百年後。聖教興於日本。』今鍾比運。願和上東遊興化。」大和上答曰。「昔聞。南岳惠思禪師遷化之後。託生倭國王子、興隆佛法。濟度衆生。又聞。日本國長屋王。崇敬佛法。造千袈裟。來施此國大德衆僧。其袈裟緣上。繡著四句曰。『山川異域。風月同天。寄諸佛子。共結來緣。』以此思量。誠是佛法興隆有緣之國也。今我同法衆中。誰有應此遠請。向日本國傳法者乎。」時衆默然。一無對者。良久有僧祥彦。進曰。「彼國太遠。性命難存。滄波（海イ）淼漫。百無一至。人身難得。中國難生。進修未備。道果未尅。是故衆僧。咸默無對而已。」和上曰。「是為法事也。何惜身命。諸人不去。我即去耳。」祥彦曰。「和上若去。祥彦亦隨去。」爰有僧道興・道抗・神項・崇忍・雲璨（登イ）・明烈・道默・道因・法藏（載イ）・老靜（曇イ）・道翼・幽巖・如海・澄觀・德清・思託等廿一人。願同心隨和上去。（中略）

是歲天寶二載癸未。當時海賊大動繁多。台州・温州・明州海邊並被其害。海路堙塞。公私斷行。僧道抗云。「今向他國。為傳戒法。人皆高德。行業肅清。此如海等少學。可停却矣。」時如海大瞋。裹頭入州。上採訪廳告白。「大使知否。有僧道抗。造舟入海。與海賊連。都有若干人。已辦乾粮。在既濟・開元・大明寺。復有五百海賊。入城來。」時淮南道採訪使班景倩聞。即大駭。使令人將如海於獄推問。又差官人於諸寺。收捉賊徒。遂於既濟寺。搜得乾粮。大明寺捉得日本僧普照。開元寺得玄朗・玄法。其榮睿師走入池水中仰臥。不良久。見水動。入水得榮睿師。普送縣推問。僧道抗隱俗人家。亦被捉得。並禁獄中。問曰。「徒有幾人與海賊連。」道抗答曰。「不與海賊連。道抗是宰相李林甫之兄林宗家僧。今送功德。往天台國清寺。陸行過嶺辛苦。造舟從海路去耳。今林宗書二通。在倉曹所。」採訪使問倉曹。倉曹對曰。「實也。」仍索其書看。乃云。「阿師無事。今海賊大動。不須過海去。」其所造舟没官。其雜物還僧。其誣告僧如海。與返坐還俗。決杖六十。遁送本貫。其日本僧四人。楊州上奏。奏至京鴻臚。檢案問本配寺。寺家報曰。「其僧隨駕去。更不見來。」鴻臚依寺報而奏。便勅下楊州曰。「其僧榮睿等既是蕃僧。入朝學問。每年賜絹廿五疋。四季給時服。兼預隨駕。非是偽濫。今欲還國。宜楊州。依例送遣。」時榮睿・普照等。四月被禁。八月方始得出。其玄朗・玄法。從此還俗別去。時榮睿・普照同議曰。「我等本願。為傳戒法。請諸高德。將還本國。今楊州奉勅。唯送我四人。不得請師。而空返無益。豈如不受官送。依旧請僧。將還本國。流傳戒法者乎。」於是巡避官所。俱至大和上所計量。大和上曰。「不須愁。宜求方便。必遂本願。」仍出正爐八十貫錢。買得嶺南道採訪使劉臣隣之軍舟一隻。雇得舟人十八口。備辦海粮。落脂紅綠米一百石・甜鼓卅石・牛蘇一百八十斤・麵五十石・乾胡餅二車・乾蒸餅一車・乾薄餅一万番・捻頭一半車・漆合子盤卅具。兼將畫五頂像一鋪・寶像一鋪・金漆泥像一軀・六扇佛菩薩障子一具・金字華嚴經一部・金字大品經一部・金字大集經一部・金字大炎經一部・雜經章疏等都一首部・月令鄣子一具・行天障子一具・道場幡一百廿口・珠幡十四條・玉環手幡八口・螺鈿經函五十口・銅瓶廿口・華氈廿四領・袈裟一千領・碍裙衫一千對・坐具一千介・大銅盂四口・行菜盂卅口・大銅盤廿面・中銅盤廿面・小銅盤卅面・一尺面銅疊八十面・少銅疊二百面・白籐箆十六領・五色藤箆六領・麝香廿剂・沈香甲香・甘松香・龍腦香・膽唐香・安息香・棧香・零陵香・青木香・薰陸香。都有六百餘斤。又有畢鉢・訶梨勒胡椒・阿魏・石蜜・蔗糖等五百餘斤・蜂蜜十斛・甘蔗八十束・青錢十千・正爐錢十千貫・

紫邊錢五千貫·羅漢頭胃二千枚·麻靴卅量·席胃卅个。僧祥彥道興·德清·榮睿·普照·恩託等一十七人。玉作人·畫師·雕檀刻鏤鑄寫繡印數文·鐫碑等工手。都有八十五人。同駕一隻舟。天寶二載十二月。舉杭東下。到狼講浦。被惡風浪波擊舟破。人物上岸。潮來水至人腰。和上在烏苳草上。餘人並在水中。冬寒風急。甚大辛苦。更修理舟。下至大板山泊。舟去不得。即至下嶼山住一月。待好風發。欲到桑石山。風急浪高。舟垂著石。無計可量。纔離嶮岸。還落石上。舟破人並上岸。水米俱盡。飢渴三日。風停浪靜。有白水郎將水米來相救。又經五日。有邏海官家。問消息。申牒明洲。大守處分。安置鄭縣山阿育王寺。(中略)

天寶三載歲次甲申。越州龍興寺衆僧請和上講律受戒。事畢更有杭州·湖州·宣州並來請和上講律。和上依次巡遊。開講授戒。還至鄭山阿育王寺。時越州僧等知和上欲往日本國。告州官曰。「日本國僧榮睿誘和上。欲往日本國。」時山陰縣尉遣人於王丞宅。搜掩得榮睿師。著枷遞送於京。遂至杭州。榮睿師臥病。請假療治。經於多時云病死。乃得放出。榮睿·普照等。爲求法故。前後被災。艱辛不可言盡。然其堅固之志。曾無退悔。和上悅其如是。欲遂其願。乃遣僧法進及二近事。將輕貨往福州。買船具辨糧用。和上率諸門徒祥彥榮睿·普照·思託等卅餘人。辭禮育王塔。巡禮佛跡。供養聖衆護塔魚菩薩。尋山直出。州大守慮同宰及僧徒父老迎送。設供養。差人備糧送。至自杜村寺。修理壞塔。勸諸鄉人。造一佛殿。至台州寧海縣白泉寺宿。明日齋後踰山。嶺峻途遠。日暮夜暗。澗水沒膝。飛雪迷眼。諸人泣淚。同受寒苦。明日度嶺。入唐興縣。日西時到國清寺。松篁蓊鬱。奇樹瓊潔。寶塔玉殿。玲瓏赫奕。壯巖花飴。不可言盡。孫綽天台山賦。不可盡其万一。和上巡禮聖跡。出始豐縣。入臨海縣。導於白峯尋江。過至黃巖縣。便取永嘉郡路。到禪林寺宿。明朝早食。發。欲向温州。忽有採訪使牒來。迫其意考。在揚州和上弟子僧靈祐及諸寺三綱衆僧同議曰。我大師和上發願向日本國。登山涉海。數年艱苦。滄溟万里。死生莫測。可共告官。遮令留任。仍共下牒告於州縣。於是江東道採訪使下牒諸州。先追所經諸寺三綱。於獄留身。推問尋蹤。至禪林寺。捉得大和上。差使押送。防護十重。圍繞至採訪使所。和尚所至縣州官人。參迎禮拜歡喜。即放出所禁三綱等。採訪使處分。依舊令住本寺。約束三綱曰防護勿令更向他國。諸州道俗聞和尚還至。各辦四事供養。競來慶賀。遞相把手慰勞。燭和上憂愁。呵嘖靈祐。不賜開顏。其靈祐曰。懺謝。乞觀喜。每夜一更立至五更謝罪。遂終六十日。又諸寺三綱大德共來。禮謝共乞歡喜。和上乃開顏耳。

天寶七歲春。榮睿·普照師從同安郡來下。至揚州崇福寺大和上住處。和上更與二師作方便。造舟買香藥。備辦百物。一如天寶二載所備。同行僧祥彥·神會·光演·頓悟·道祖·如高·德清·日悟·榮睿·普照·思託等道俗一十四人。及化得水手一十八人。及餘樂相隨者。合有卅五人。六月廿七日。發自崇福寺。至揚州新河乘舟。下至常州界狼山。風急浪高。旋傳三山。明日得風。至越州界三塔山。停住一月。得好風發。至暑風山。停住一月。十月六日晨朝。和上云「昨夜夢見三官人。一著緋。二著綠。於岸上拜別。知是國神相別也。疑是度必得渡海也。」少時風起。指頂岸山發。東南見山至日中其山滅。知是蜃氣也。去岸漸遠。風急波峻。水黑如墨。沸浪一透。如上高山。怒濤再至。似入深谷。人皆荒醉。但叫觀音。舟人告曰「舟今欲沒。有何所惜。」即牽棧香籠欲拋。空中有聲言。「莫拋。」。即止。中夜時。舟人曰「莫怖。有四神王。著甲抱杖。一在舟頭。一在檣舳邊。」衆人聞之。心裏稍安。三日過蛇海。其蛇長者一丈餘。小者五尺餘。色皆斑。滿泛海上。三日過飛魚海。白色飛魚翳滿空中。長一尺許。五日經飛鳥海。鳥大如人。飛集舟上。舟重欲沒。人以手推。鳥即銜手。其後二日无物。唯有急風高浪。衆僧惱臥。但普照師每日食時行生米少許。與衆僧。以充中食。舟上无水。嚼米喉乾。咽不入。吐不出。飲鹹水腹即脹。一生辛苦。何劇於此。此海中忽有四隻金魚。長各一丈許。走繞舟四邊。明且風息見山。人惱渴水。臨欲死。榮睿師面色急然怡悅。即說云「夢見官人請我。受戒懺悔。睿曰。『貧道甚水渴。欲得水。』彼官人取水與睿。水色如乳汁。取飲甚美。心既清涼。睿語其官。(人イ)。『舟上卅餘人。多日不飲水。甚大飢渴。請檀越早取水來。』時官人喚雨令老人。處分云。『汝等大了事人。急送水來。』夢相如是。水應今至。諸人急須破把椀待。」衆人聞此。忽歡喜。明日未時。西南空中雲起。來覆舟上注雨。人把椀承水飲。第二日亦雨至。人皆飽足。明日近岸。有白四魚來。引舟直泊舟浦。舟人把椀競上岸頭覓水。過一小崗。便遇池水。清涼甘美。衆人爭飲。各得飽滿。後日更向池。欲汲水。昨日池處。但有陸地而不見池。衆共悲喜。知是神靈化出池也。是時冬十一月。花藥開敷。樹實竹筍。不辨於夏。凡在海中經十四日。方得著岸。遣人求浦。乃有四經紀人。便飲道去。四人口云。「和上大果報。遇於弟子。不然合死。此間人物喫人。火急去來。」便引舟。去入浦。晚見一人。被髮帶刀。諸人大怖。

與食便去。夜發。經三日。乃到振州。江口泊舟。其經紀人往報郡。其別駕馮崇債。遣兵四百餘人來迎。引至州城。別駕來迎。乃云。「弟子早知和上來。昨夜夢有僧。姓豐田。當是債舅。此間若有姓豐田者否。」衆僧皆云。「無也。」債曰「此間雖無姓豐田人。而今和上即將當弟子之舅。」即迎入宅內。設齋供養。又於大守廳內。設會受戒。仍入州大雲寺。安置其寺。佛殿壞落。衆僧各捨衣物。造佛殿。住一年造了。別駕馮崇債自備甲兵八百餘人。送經四十餘日。至萬安州。大首領馮若芳。請住其家。三日供養。若芳每年常劫取波斯船三二艘。取物爲己貨。掠人爲奴婢。其奴婢居處南北三日行。東西五日行。村相次。忽是若芳奴婢之住處也。若芳會客。常用乳頭香爲燈燭。一燒一百餘斤。其宅後蘇芳木。露積如山。其餘財物亦稱是焉。行到岸州界無賊。別駕乃迴去。榮睿・普照師從海路。經四十餘日。到岸州。遊奕。大使張雲出迎拜謁。引入令住開元寺。官寮參省設齋施物。盈滿一屋。彼處珍異口味。乃有益智子・檳榔子・椰子・荔支子・龍眼・甘蕉・枸蒞・樓頭。大如鉢盂。甘甜於蜜。花如七寶色。瞻唐香樹聚生成林。風至香聞五里之外。又有波羅棕樹。菓大如冬瓜。樹似檳榔。似畢鉢菓子。同今見葉。似水葱。其根味似乾柿。十月作田。正月收粟。養蠶八度。收稻再度。男著木笠。女著布絮。人皆彫蹄鑿齒。繡面鼻飲。是其異也。大使已下至豐正。作番供養衆僧。大使自手行食。將優雲鉢樹葉。以充生菜。復將雲鉢子供養衆僧。乃云。「和上知否。此是優雲鉢樹子。此樹優子無花。弟子得遇和上。如優雲鉢花甚難值遇。」其葉赤色。圓一尺餘。子色紫丹。氣味甜美。彼州遭火。寺並被燒。和上受大使請造寺。振州別駕聞和上造寺。即遣諸奴。各令進一椽。三日內一時將來。又即構佛殿講堂塔。椽木有餘。又造釈迦丈六像。登壇授戒。講律度人已畢。即別大使去。仍差澄邁縣。令看送上船。三日三夜。便達雷州。羅州・并州・象州・白州・傭州・騰州・梧州・桂州等官人僧道人僧道父老迎送禮拜。供養承事。其事無量。不可言記。始安郡都督上黨公馮・古璞等。步出城外。五體投地。接足而禮。引入開元寺。初開佛殿。香氣滿城。中僧徒。擎幡燒香唱梵。雲集寺中。州縣官人百姓填滿街衢。禮拜讚嘆。日夜不絕。馮都督來。自手行食。供養衆僧。請和上受苦薩戒。其所都督七十四州官人。選舉試學人。併集此州。隨都督受苦薩戒人。其數無量。和上留住一年。時南海郡大都督五府經略採訪使攝御使中丞廣州太守盧煥。牒下諸州。迎和上向廣府。時馮都督來。親送和上。自扶上船。口云。「古璞與和上終至彌勒天宮相見。」非泣而別去。下桂江七日。至梧州。次至端州龍興寺。榮睿師奄然遷化。大和上哀慟悲切。送喪而去。端州太守迎送至廣州。盧都督率諸道俗。出迎城外。恭敬承事。其事無量。引入大雲寺。四事供養。登壇受戒。此寺有呵梨勒樹二株。子如大棗。又開元寺有胡人。造白檀花嚴經九會變。工匠六十人。卅年造畢。用物四十萬貫錢。欲將往天竺。採訪使劉臣鄰奏狀。「勅留開元寺供養。七寶莊嚴不可思議。又有婆羅門寺三所。竝梵僧居住。池有青蓮花。葉莖根竝芬馥奇異。江中有婆羅門・波斯。崑崙等船不知其數。竝載香藥珍寶。積載如山。其舶深六七丈。師子國・大石國・骨唐國・白蠻・赤蠻等往來居住。種類極多。州城三重。都督六纛一纛一軍。威嚴不異天子。紫紵滿城邑。居逼側。大和上住此一春。初向韶州。傾城送遠。乘江七百余里。至韶州禪居寺。留住三日。韶州官人迎引。入法泉寺。乃是則天爲惠能禪師造寺也。禪師影像今現在。後移開元寺。普照師從此辭和上。向嶺北。去至明州阿育王寺。是歲天寶九歲也。時和上執普照手。悲泣而曰「爲傳戒戒律。發願渡海。遂不至日本國。本願不遂。於是分手。感念不喻。」（中略）

天寶十二載歲次癸巳十月十五日壬午。日本國使大使特進藤原朝臣清河・副使銀青光祿卿大伴宿彌胡萬（磨<sup>い</sup>）・副使銀青光祿大夫秘書監吉備朝臣眞吉備・衛尉卿安倍朝臣朝衡等。來至延光寺。白和上云「弟子早知和上五遍渡海。向日本國。將欲傳教。今親奉顏色。頂禮歡喜。弟子等先錄和上尊名。并持律弟子五僧。已奏聞主上。向日本傳戒。主上要令將道士去。日本君王先不崇道士法。便奏留春挑（桃<sup>い</sup>）原等四人。令住學道士法。爲此和上名亦奏退。願和上自作方便。弟子等自有載國信物船四舶。行裝具足。去亦無難。和上許諾已竟。時揚州道俗皆云「和上欲向日本國。」由是龍興寺防護甚固。無由進發。時有仁幹禪師。從務州來。密和上欲出。備具船舫於江頭相待。和上於天寶十二載十月廿九日戌時。從龍興寺出至江頭。乘舫下。時有廿四沙彌。悲泣趁來。白和上言「大和上今向海東。重覲無由。我今者最後請預結緣。」乃於江邊。爲廿四沙彌受戒。訖乘船下。至蘇州黃泗浦。相隨弟子揚州白塔寺僧法進・泉州超功寺僧曇靜・台州開元寺僧思託・揚州興雲寺義靜・衢州靈耀寺法載・寶州開元寺僧法成等一十四人。藤州通善寺尼智首等三人。揚州優婆塞潘仙童・胡國人安如寶・崑崙國人軍法力・瞻波國人善聽。都廿四人。所將如來肉舍利三千粒・功德繡普集變一鋪・阿彌陀如來像一鋪・瑠璃白旃檀千手像一軀。繡千手像一鋪・

救苦（世<sub>い</sub>）觀世音像一鋪・藥師彌陀彌・勒菩薩瑞像各一軀・同障子・大方廣佛花嚴經八十卷・大拂名經十六卷・

〔金字大品經一部・金字大集經一部〕南本涅槃經一部<sup>卅八卷</sup>・四分律六十卷・法勸師四分疏五本各十卷・光統律師四分疏百廿紙・鏡中記二本・智周師菩薩戒疏五卷・靈溪釋子菩薩戒疏二卷・天台止觀法門〔絃義文句各十卷・四教義十二卷・次第禪門十一卷・行法花懺法一卷・小止觀一卷〕六妙門一卷・明了論一卷・定賓律師飭崇義記九卷・補亡（釋<sub>い</sub>）飭崇記一卷・戒疏二本各一卷・觀音寺亮律師義記二本十卷・終南山宣律師含注戒本一卷及疏〔行事抄五本・羯磨疏等二本〕・懷道（素<sub>い</sub>）律師戒本疏四卷・〔大覺律師批記十四卷・音訓二本・比丘尼傳二本四卷〕・玄奘法師西域記一本十二卷・終南山宣律師關中創戒壇圖經一卷・〔法銑律師尼戒本一卷・及疏二卷〕合卅八（四十<sub>い</sub>）部、及玉環水精手幡四口・〔□□金珠□西國瑠璃瓶盛□〕菩提子三斗・青蓮華廿莖・玳瑁豐子八口・天竺草履二量・王右軍真跡行書一帖・小王真跡三帖・天竺末和等雜書五十帖（水精<sub>い</sub>）〔□□□□〕。手幡以下。皆進內裏。又阿育王塔樣金銅塔一區。廿三日庚寅。大使處分。大和上已下分乘副使已下舟已畢。後大使已下共議曰。「方今廣陵部覺知和上向日本國。將欲搜舟。若被搜得。爲使有殃。又被風漂還著唐界。不免罪惡。」由是衆僧忽下舟留。十一月十日丁未夜。大伴副使竊招和上及衆僧。納己舟。忽不令知。十三日。普照師從越州餘姚郡來。乘吉備副使舟。十五日壬子。四舟同發。有一雉。飛第一舟前。仍下訂留。十六日發。廿一日戊午。第一第二舟。同到阿兒奈波嶋。在多禰嶋南西。第三舟昨夜已泊同處。十二月六日南風起。第一舟著石不動。第二舟發向多禰去。七日至益救嶋。十八日益救嶋發。十九日風雨大發。不知四方。午時。浪上見山頂。廿日乙酉午時。第二舟著薩摩國阿多郡秋妻屋浦。廿六日辛卯。延慶師引和上入大宰府。天平勝寶六年甲午正月十二日丁未。副使從四位上大伴宿禰胡滿麻呂奏。「大和上到天竺至大宰府。」二月一日。到難破。唐僧崇道等迎慰供養。三日至河內國。大納言正二位藤原朝臣仲麻呂遣使迎慰。復有道璿律師。遣弟子僧善談等迎勞。復有高行僧志忠・賢璟・雲（靈<sub>い</sub>）福・曉貴等卅餘人。迎來禮謁。四日。入京。勅遣正四位下安宿王。五日。於羅城門外。迎拜慰勞。引入東大寺安置五日。唐僧道璿律師波羅門菩提僧正來慰問。宰相右大臣大納言已下下級官人百餘人。來禮拜問訊。後勅使正四位下吉備朝臣眞備來。口詔曰「大德和上遠涉滄波。來投此國。誠副朕意。喜慰無喻。朕造此東大寺。經十餘年。欲立戒壇傳受戒律。自有此心。日夜不忘。今諸大德遠來傳戒。冥契朕心。自今以後。授戒傳律。一任和上。」又勅僧都良辨。令錄諸臨壇大德名。進內。不經日。勅授傳燈大法師位。其年四月。初於廬舍那佛殿前。立戒壇。天皇初登壇。受菩薩戒。次皇后・皇太子亦登壇受戒。尋爲沙彌澄修等四百四十餘人受授戒。又奮大僧靈福・賢璟・志忠・善頂・道縁・平徳・忍基・善謝・行潛・行忍等八十餘僧。捨奮戒重受和上所授之戒。後於大佛殿西。別作戒壇院。即移天皇受戒壇土築作之。大和上從天寶二載始爲傳戒。五度裝束。渡海艱辛。雖被漂廻。本願不退。至第六度邁日本。卅六人惣無去。退心道俗二百餘人。唯有大和上・學問僧普照・天台僧思託。終始六度。經逾十二年。遂果本願。來傳聖戒。方知濟物慈悲。宿因深厚。不惜身命。所度極多。時有四方來學戒律者。縁無供養。多有退還。此事漏聞于天聽。仍以天平寶字元年丁酉十一月廿三日勅施備前國水田一百町。大和上以此田。欲立伽藍。時有勅旨。施大和上園地一區。是一品新田部親王之舊宅。普照・思託勸請大和上。以此地爲伽藍。長傳四分立藏・法勸四分立疏・鎮國道〔場〕壇飭崇義記・宣律〔師〕鈔・以持戒之力。保護國家。和上言「大好。」即天平寶字三年八月一日私立唐律招提名。後請官額。依此爲定。還以此日。請善俊師。講件疏記等。所立寺者。今唐招提寺是。初大和上受中納言從三位氷上眞人之請。詣宅竊嘗其土。知可立寺。仍語弟子僧法智。「此福地也。可立伽藍。」今遂成寺。可謂明鑒之先也。和上誕生像季。親爲佛使。經云。「如來處<sub>レ</sub>度人。汝等亦數如來。廣行度人。」和上既承遺風。度人逾於四方。如上略述。及講遍數唐道璿律師請大和上門人思託曰。「遠承學有基緒。璿弟子閑漢語者。合學勵疏并鎮國記。幸見開導。」僧思託便受於大安寺唐院忍基等請。四五年中。研磨數遍。寶字三年。僧忍基於東大唐院。講疏記。僧善俊於唐寺。講件疏記。僧忠惠於近江。講件疏記。僧惠新於大安塔院。講件疏記。僧常巍於大安寺。講件疏記。僧眞法於興福寺。講件疏記。從此已來。日本律儀漸<sub>レ</sub>嚴整。師<sub>レ</sub>相傳。遍於寰中。如佛所言。我諸弟子展轉行之。即爲如來常在不滅。亦如一燈燃百千燈。冥者皆明。明<sub>レ</sub>不絕。寶字七年〔癸卯〕春。弟子僧忍基夢見講堂棟梁摧折。寤而驚懼。知大和上遷化之相也。仍率諸弟子。摸大和上之影。是歲五月六日。結跏趺坐。面西而化。春秋七十七。化後三日。頂上猶煖。由是久不殯殮。至於闍維。香氣滿山。平生常謂僧思託

言。「我若終亡。願坐死。汝可爲我。於戒壇院別立影堂。舊 住房與僧住。」千臂經云。「臨終端坐。如入禪定。當知此人已入初地。」以茲驗之。聖凡難測。寶龜八年丁巳。日本國使聘唐揚州諸寺。皆承大和上之凶聞。惣著喪服。向東舉哀三日。都會龍興寺。設大齋會。其龍興寺。先是失火皆被燒。大和上昔住院房獨不燒損。是亦戒德之餘慶也。

唐大和上東征傳一卷

〔寶龜十年歲次己未二月八日己卯撰〕

五言。被謁大和上二首 并序 （下略）